

〈悼三良〉

靈帷壙穴動英風，三子存為萬鬼雄。
款款効忠投信義，遙知黃鳥刺秦公。

〈道旁見柳〉

河橋岸曲綠楊堤，輕點殘暉欲染溪。
園柳若無離別恨，枝疎影瘦為誰低？

〈日月潭雜詠之一 雨中觀潭〉

耆舊多聞將雨日，石湖潮動響聲洪。
棹郎返岸鷗鳧引，墨客傳杯笙磬同。
潭嶼相連收浩渺，水天交映結冥濛。
太虛遠闊乾坤外，一襲煙蓑鶴髮翁。

〈日月潭雜詠之二 訪邵族有感〉

先民逐鹿不毛田，鑿牖耕廬歲漸遷。
宗婦杵音遊岫幌，祖靈祭典接豐年。
口簧春石清聲愜，背篋弓弣巧藝妍。
我訪山村心正快，茄苳卻倚夕陽眠。

〈日月潭雜詠之三 潭畔山櫻花〉

麗日山櫻罩路陞，林梢吐燄畏風吹。
妝枝照蕊臨湖鏡，棲鳥爭飛鬧欲窺。

〈日月潭雜詠之四 拉魯島〉

雙龍逐戲巧銜珠，風舉翻雲錯落湖。
光緒勤綏興教化，昭和敬祀盼匡扶。
舟帆遠近謳歌繞，雁鴨高低濯影呼。
坐擁群峰酣夕籟，澄觀世變古今殊。

〈薰風〉

坐臥陶窗竹引風，飛簾吹捲掛晴虹。
南薰朝爽彌幽徑，輕動芙蓉映水中。

〈高北道中口占〉

歸途轉轂過津梁，游行沿途樂未央。
向暮不知行旅倦，笑談夕鳥戀斜陽。

〈南投行旅之一 藍田書院〉

朱公延建集才賢，風教無殊種玉田。
濟化堂上朝氣象，育英室外夕陽天。
振綱博覽韋編卷，明道澄觀縹帙篇。
進學何須鐘鼎業？冰心一片忘蹄筌。

〈南投行旅之二 林圯墓〉

參軍赴斗六，東進與番攻。
涉澤豺狼盡，披榛虎豹窮。
丹青垂武略，碑碣弔雄風。
江漢淮夷定，流芳貫日虹。

〈南投行旅之三 清德寺〉

禽止雲歸暮靄清，千巖古寺晚鐘鳴。
旃檀紫殿懸燈下，禪坐觀心一鏡明。

〈南投行旅之四 八通關古道〉

八通中路昔多聞，騁足徒行解緒紛。
父子崖前接料峭，雲龍瀑下擁氤氳。
杜鵑灼灼山方廓，楠蠟萋萋夕漸曛。
杖策尋幽攀古磴，遐思眈眈逸出群。

〈夕歸〉

溯游臨曲岸，向夕片帆收。
橋影浮晴渚，雲光染薄裘。
肩輿隨驛館，酒甕謝朋儔。
野趣青山外，賓鴻共映眸。